

頤
道
堂
詩
選

頤道堂詩選卷十二

古今體詩

人日草堂對雪

草堂人日題詩處玉戲閒庭快雪初竹葉共傾新歲酒梅

花遠寄故人書老農失喜新畬熟還卒衝寒廢壘虛

時徐州撤

防守兵雲間
戍士將還

消盡東南災沴氣中原民困問何如

青溪道中見九峯殘雪

一棹青溪路湖山作畫看晚波三泖合殘雪九峯寒霞外

橫歸雁雲中憶采鸞分明雙載路過盡好峯巒

田家春日效東野

屋角杏花白門前桑葉暗布穀催出耕耨鋤紛荷擔野卉
隨意生紅紫被田礪青裙妬芳草婦子意恬憺舊年歲有
秋儲粟滿罌甌官租幸無多八口足飲啗擊鼓饗社公斜
日古壇紺閒雲不成雨意與碧天淡歸來舁泥船閒繫梅
根纜計日飼春蠶浴種微波澹

旋戍

春風吹暖上軍牙一片歡聲動曉笳去日定應歌杖杜歸
期剛及放梅花中原民氣憑誰復江表軍容亦自華省識
太平新景象將軍旋府卒還家

雲間詠古梅

扶醉看春影明燈麗且閒香疑來月下花亦重雲間舞鶴

煙霞態仙人冰雪顏西溪三萬樹歸夢落春山

楊將軍歌聽張東麓大令

炳林

談楊軍門

遇春

滑縣

破賊事

楊將軍眞英雄丹忱吐氣生長虹百戰掃盡白蓮賊甘涼
坐挂天山弓青犢披猖曹定起烽火滑臺三百里萬衆死
踞道口集列鎮紛紛森壁壘將軍鼓角從西來營門殺氣
聲如雷帳下健兒盡麒麟虎旌旗直指風雲開一可當百
敵萬將軍率衆身搏戰深入賊腹出賊背弓如霹靂馬如
電賊衆星散逸入城十萬衆結三重營偏陽雖小守頗固
長圍久築無堅兵將軍老謀出奇計不騰九天入九地賊
中墨守能料敵隧地者五露其四以此四者驕賊心賊中

快水波淫淫獨以一隧隱古寺舂鏑力透重關深上策火
攻真有數萬丈火繩然以布滿城蛾賊方厝薪自詡老熊
臥當路地雷忽起賊衆驚西南一角高城傾萬衆排牆競
前進健兒肉薄爭驍騰此時四面雲梯高壯士林立森短
刀我兵登堞賊墮壕馬蹄滑達流人膏滿城煙霧漲天黑
腰下長纓爭縛賊蝥駘狼狽一鼓擒捷書萬里生顏色吾
聞賊中頗有人誤以謀者呂廣文羣鼠共穴免滋蔓至今
萬口銘其勲都統逸賊事頗奇顛倒功罪心然疑賴有經
略善將將精卒終隸將軍麾將軍有謀必奇策將軍每戰
必盡力天授孫吳一片心功在史牋不具說從此萬里無
兵戎將軍功卽經略功從知古來軍旅事文武將相須和

衷擲筆一笑青天空

司寨行聽東麓大令談楊將軍芳破賊事

滑縣夜半城門開賊騎大出聲如雷官兵堅壁賊四逸封
狼徧野蜚鴻哀木蘭都統擁兵坐將軍偏師賊中過賊多
兵少勢不敵賊黨西來截軍破左股矛傷尙力戰戰血淋
漓戰袍浣乞師夜叩都統營都統握節方專征將軍敢戰
損國體罪在輕進非知兵將軍忠勇誓報國肯以微傷輕
逸賊拂衣逕出上馬去帳下健兒一心力晝夜兼程五百
里太行山麓橫空峙賊已踞險守山梁一夫當關衆心死
後軍不繼無周防臺站不設無餽糧破釜沉舟亦何濟將
軍此際心徬徨淇縣之官周大尹運米東來同指囷邑中

之士李縣丞餽以火藥兼火繩將軍得之奮然起謂此賊衆當滅矣馬騰士飽奮一戰目中已無堅壁壘將軍騎馬身當先左手執旗右執鞭衆兵魚貫靜若川一氣直欲登山巔未登山巔及山半路轉峯迴臨絕岸蠶叢鳥道馬不進一綫懸厓忽中斷將軍棄馬徒步行衆兵踴躍猿猱輕攀藤附葛不辭險十八盤盡天門平我兵見賊賊見我將軍卓立陣雲裏旗右一揮右甄右旗左一揮左甄左兩軍相近聲相接礮火聲中飛霹靂我兵千人賊衆萬桀石憑高更鳴鎗索倫健旅非凡才金川百戰攻礪來騰身直上勢無敵萬峯書聲聲崩摧高樓三成堅石壁烈炬焚之怒燂赤千奴共膽擁賊首焚後屍骸相枕藉陸渾山火烹長

鯨飛燕白雀知主名滑城賊衆始奪氣韓碑計日淮西平
吁嗟乎男兒報國心如鐵跋扈高昂何足責漢家高閣畫
麒麟一時競爽楊無敵

南橋觀浚河

桃花含雨柳含煙黃浦春波昨夜船問俗恐虛耆老意焚
香媿說長官賢農心最重惟三月水利還須計百年我亦
西怜荷耒客笠檐蓑袂憶耕田

舟過南橋

綠水初平不待潮掠波燕子送輕橈桃花細路垂楊岸春
在南塘第一橋

輓家默齋都督

銅虎分符海上城，雪鴻省宿憶生平。西洋使者曾相識，南海神祠舊有名。畫戟凝香春對酒，書牀拂燭夜譚兵。回思三十年來事，暮雨寒燈總愴情。君攝象山都司曾登英吉利舟與夷使爭禮

君官閩嶠我遊燕，魚雁頻通寄遠箋。偶讀陰符開劒室，思從滄海領戈船。臺澎水落鯤身暗，旗鼓山高雁陣圓。憑弔先人殉節地，夜潮悲嘯虎門煙。

往年青犢大披猖，曹定移軍話戰場。自與晉師成犄角，更無秦謀誤周防。羽林合隊旌旗暗，節度分兵士馬強。一樣勤勞缺功狀，漢家舊事有陳湯。

經歲辛勤息鼓鼙，滇池移節暮天低。眼看屬國來金象，魂斷神山祀碧雞。巫峽雲深歸鶴遠，荆門月落暮猿啼。鳩茲

江上全家在淚灑江流夕照西

節烈恭人詩

癸酉秋九月十五直隸逆民林清糾衆犯 禁籞

約滑縣民李文成爲外援滑令知之先期捕文成
下之獄林不知也以無外援入內之衆殲焉林亦
被獲而文成之黨以衆襲滑城令全家死者三十
四人子婦徐罵賊不屈被釘柱轡割以死直省獲
賊黨言其狀如繪事 聞令以破賊謀斷其外援
得以速蕺事功甚鉅 賜諡忠烈本籍及滑城皆
建專祠二子一賜騎都尉一賜舉人徐諡節烈恭
人建專祠於後從死三十餘人並祀焉令強姓克

捷名韓城人

黑雲壓城城欲摧滑城礮火聲如雷縣官喫血殉城死三十四口同其災恭人如花復如玉白骨全家同一哭舌鋒如劒齒如刀罵賊肯受羣奴辱鐵錐貫柱刃裂頤落花片片凝燕支身糜骨碎皆不惜春風白刃甘如飴將軍玉帳大出師三月克捷旋軍磨巖輔獲賊詢死狀再拜一表鋪丹墀九重動容六宮歎生死兩地皆專祠是歲癸酉月在戌蚤駝作奸狐鬼密秦宮已見警蘭池漢殿俄聞觸寶瑟縣官先期縛獠狂一門併命賊亦傷外援旣斷內難寢徒薪曲突功非常聖主褒忠復褒烈節烈恭人書史牒縣官子婦母族徐縣官者誰強克捷

將歸吳門畱別青邨送者

印牀脫手宦囊輕

畱別舊句

珍重諸君遠送行別路殷勤惟酒

盞官場蹤蹟似棋枰焚香媿說神明意飲水難酬父老情

願爾年年樂豐歲一河新漲足春耕

父老二百餘人詣大府乞畱故有第六句

風輕帆輕去若飛水花如雨撲雲衣江邊月落潮先落海

上春歸客亦歸青鳥記曾勞遞信白鷗相對本忘機分明

記得來時路一角橫雲寫翠微

姬人湘玉同舟

小蒸訪管仲姬故里

仲姬才望問如何故里雲林一刹那內史畫圖畱六鵠王

孫身世感雙鵝樓前楊柳春陰舊莊外蓮花夕照多未肯

微詞薄松雪閨中人亦署鷗波

北嶺攝篆荆溪重建國山碑石亭詩以紀事

國山碑詩吾曾作國山碑石吾未見孫吳歲月溯天冊江
南山水美陽羨離墨山頭落葉擁善權洞口古苔徧千祥
百怪僞符瑞頌德銘功冒封禪西戍已聞縣竹漬東下竟
忘木枿旋張杜合志急覆棊渾濬爭功迅傳箭戰士十萬
卸戈甲宮人五千飾容鬻青葢入洛久面縛鐵鎖橫江空
血戰松楸鬱鬱古陵墓烏鳶寂寂荒宮殿乾洞水洞老空
山鼓碑圉碑徵俗諺四十三郡寒秋煙千七百年過飛電
唐衢好古覆亭榭亭爲唐陶山太守
宰荆溪時所建吳質搜奇勞筆硯吳
考萊陽公子逸興發荆溪大令勝情擅神明已息閒田
訟美政仍令廢亭建生平笑我癖金石博雅遜君深志傳

岐陽獵碣摹右牋岱頂秦碑探重阨會同神識訪皇象兼
向祝陵弔婉孌

雨後過可園

東風吹散柳絲絲闌角斜陽影漸移一半溼雲收未盡樹
頭殘雨滴春池

五龍神祠題壁

五龍祠中香燈瑩五龍祠下潭水腥潭廣一丈深二尺水
色黯黯涵深青人言其下龍所伏五龍雖分實一族甘霖
之沛等閒耳一雨應知四郊足豈知一龍已上天去棲金
爵觚稜前一龍南入羅甸川天使大澤膏窮邊一龍突兀
牙須全噓雲飲霧噴毒泉一龍抱珠白日眠雨工懶臥不

受鞭中央一龍率龍部但作風雷不行雨甲光向日照天
地怒鰐跋鼉盡龍語學龍語傳龍意揚鬚一怒軒天地東
田潤澤西田枯神龍之神太恣肆龍兮龍兮爾職在行雨
爾力能迴天爾何不學商傳說作霖雨大田一例多豐年
使我亦得煩疴蠲亦能焚香頌德銘汝賢

輓張船山太守

十年京洛問騷壇第一才人壓建安自有詩名齊李杜卽
論文望亦蘇韓際天星斗懷中落絕代風雲筆底蟠讀到
寶雞題壁句長虹落紙夜光寒

一麾出守誤延年管領蓬萊署謫仙渤海新篇人所誦淀
津一疏世猶傳東方大隱期諧俗北海高情祗任天笑解

朝簪便歸去浣花溪隔草堂煙

片帆煙月五湖西
暫向吳門理釣磯
招隱有心家尚遠
買山無力願相違
鴻因避弋頗畱蹟
鷗到忘機亦懶飛
跌宕江湖醉花月
淚痕清露各沾衣

敬通五厄事難知
消渴文園病不支
春水偶然渡桃葉
香山畢竟遣楊枝
安仁有母終天恨
伯道無兒後世悲
太息精靈歸死友
蓉城殘墨護遺詩

水車行

辘轳辘轳脫節蛇翩翩
反反銜尾鴉

東坡句

江南澤國水爲

家家兒女能踏車
年年水車何太逸
但得蒔秧功已畢
黃梅水多夏雨足
挂壁水車密於櫛
今年魃降龍不靈
赤

日杲杲青天青四月不雨至七月朝車夜車車不停官河
已涸一千里農家車水猶未止豨膏棘軸齟齬車輪之
勞尙如此別有高田與腹裏乞漿無地渴欲死夜中枵腹
茅檐底羨煞鄰邨尙車水

得顧鄭鄉塞外書時在梅庵尙書吉林戍所

重謫朱崖李衛公感君高義遠相從天涯我正思臨賀此
客人休說敬容馬邑山川壯遊覽雞林文字拓心胸一書
剪燭更番讀爲自龍沙塞外封

七夕送鐵雲至眞州同樊邨作

天外碧雲秋明河近畫樓一帆涼月夜送子木蘭舟衣食
中年感煙波客子愁相思不相見爲我語眞州

贈鈕匪石並示婁東蕭樊邨長洲李四香三子皆錢
竹汀宮詹門下士也並寄阮中丞師豫章卽書家
曼兄所作片石圖後

宮詹門下士我識李與蕭蕭生富經術博辨稱儒梟餘事
爲詞章出入莊列騷李生精周髀均輪測重霄頗疑古疇
人絕學師軒堯鈕君篤學人品味如醇醪小學最精審字
字瑛瓊瑤我聞小學者大學之根苗訓詁與形聲設範如
分茅說文九千字漢代尉律教傳自許叔重厥官曾治涑
解字義例嚴證經息譁囂凡將與訓纂揚馬矜蟲雕讀書
先識字本固方舒條二徐味古訓新附紛喧呶君從宮詹
學講習忘劬勞古鼎辨眞贋目力窮秋豪一作毫點畫求根源

不使高曾祧書成洛紙貴萬手爭傳鈔浙士夙寡學搶榆
陋鷦鷯淮南使者來玉節乘星輶蒼正課學僮橐筆盈庠
膠書賈利三倍捆載乘吳舳經舍議合祀歲事虔牲膋如
從淫哇中古學聞咸韶我生學也晚緒論盈陶匏惜未從
宮詹問字窺星杓識君憶丙寅二月方花朝把臂護經室
談辨傾酒瓢飛龍泝崔駰爰厯論趙高如登宮詹門絕學
追姬姚我嘗遊辟雍石經觀園橋蔣衡沿俗書校本亦頗
清禮堂孰寫定濟濟衣空褒倘得君數輩點竄逮俊髦名
論魏江式高議晉伏滔行見嘉禾苗盡使稂莠薶如何溷
塵市珠玉英光韜君家莫釐峯具區在堂坳東山舊書局
紅蕙香尙苞吾兄昔寫此與君訂石交一拳翠微色神秀

爭函嶠今春重相見相形嗟斗筭讀書誤梅賸飲易慙陳
桃未逐康成車魯儒空受嘲君既辱泥塗二子皆蓬蒿絕
業自千載豈爲升沉撓廣陵黯雲樹豫章橫江潮戟門阻
魚鑰悵望龍門遙

松壺自秣陵來月夜過余桂葉書堂話舊卽送之雲
間次首兼憶陶谷之勝同樊邨作

一片秦淮月隨君汗漫遊偶停吳苑棹來話秣陵秋畫筆
渺黃鶴詩情狎白鷗明朝挂帆去身世又孤舟

聞道陶貞白青山有舊居草堂萬峯裏松樹六朝餘羨爾
歌招隱談禪更讀書西溪好煙水吾亦夢耕漁

松壺爲余作雪鴻小影冊子各題一律

岱嶽望雲

思親也辛酉春偕潘紅茶

恭辰

朱叔

堂

爲弼

諸子北上道經泰安登岱崇絕頂南望白

雲慨焉生遊子之感

思親憶親舍南望白雲飛雲飛不可極遊子何時歸日觀
上清曉天門開翠微浮名爾何物辛苦事征衣

長安聽雨

憶弟也仲弟壽蘇臥病經秋余在京

師聞夜雨而憶之今下世十七年矣

夜雨爾何事使人生遠哀不堪盡語切況有雁聲來池草
更無夢庭花曾未開湖陰一坏土寂寞冷青苔

蓉館詩盟

憶同調也蓉湖楊農部

芳燦

詩派與

余同出梅邨祭酒世稱楊陳

跌宕追元白雄奇抱杜韓詩家推祭酒吾輩其騷壇思捷
春花發吟深夜月殘舊時遊賞地落葉滿長安

雲園花讌懷舊雨也旅食京華寓孫古雲龔伯

雲繪園者三年花月之夕輒置酒賦詩爲樂

三載春明住琴尊識舊家高臺秋酹月小榭晚評花廢壘
尋春燕空庭散暮鴉何年共歸隱閒種召平瓜

江國停橈感萍蹤也試吏院中者十九日故人

憶我不能無詩

江行三百里過盡萬峯青舊雨曾同聽謂屏泉閒雲此一停

小池明受月高樹碧橫星回首茹香閣疎闌坐拂螢茹香閣鄰

司理家
水榭也

關山轉饒 憫行役也轉饒河上經清流關避雨

大樹下

七峯分岸立萬樹抱山橫車馬盤雲上關山冒雨行溼衣
憐倦僕華髮感勞生前路滁陽渡清流徹底清

袁浦防秋 志河渠也丙辰試吏皖中鐵梅庵宮

保檄余從事河壩次年春濬河雲梯關河復敘勞

改官江南

一卷防秋略三更剪燭談勞生久河北宦蹟又江南改道
勞頻議宣房未盡諸雲梯關下路髡柳尙毵毵

吳淞籌海 志武備也戊辰攝篆寶山吳淞海口

距城七里楊節鎮樓船在焉

一片吳淞水驚濤下海門
戈船寄韓說烽火說孫恩犀甲
勞諸將虹旗見列屯
閒來坐明月劒術亦同論

長城秋月 紀遠遊也癸丑秋從琅嬛中丞熱河
還宿古北口夜分月出斷城上若古鏡之離匣矣
青天一明月流影照長城
明月舊時色長城萬古情
胡姬青海怨羌笛玉關聲
迴首陰山路涼秋事遠征

滄海春帆 感勞生也戊辰春于役崇明至海門
往來海上者兩旬長風飽帆歸來春事過半矣

春色滿天地獨爲海上遊
滄波渺無極身世此扁舟
夜靜龍吟急雲開雁陣秋
盧敖吟一卷歸付小紅樓

海上得詩百篇歸付

湘姬
錄之

琅嬛刻燭 感知己也受知淮南迴首十載授經
佐幕半與家曼生共之

玉帳談兵日雲亭載酒年生平數知己第一是琅嬛苑樹
鳴殘夜池花溼暮煙因懷吟館夢風雨對牀眠

靈隱藏書 思著述也琅嬛中丞設書藏於靈隱
因以所著藏焉

千秋未可必一卷託名山石壘高僧護青燈古佛間浮名
半天下副本出入間作者寥寥數他年若是班

花海扁舟 慕偕隱也內子玉晨與余有偕隱西
溪之約花海西溪也梅花萬樹若香海焉

何日竟歸去花海泛扁舟閒泊古梅樹遠招雙白鷗青山

隱香雪翠羽夢羅浮便欲攜家去長吟不可留

鷗波書記慰素心也管姬湘玉能詩爲余掌書

記所居曰小鷗波館

美人宜氏管花外小鷗波畫閣煙雲供書仙翰墨多琴聲
遲夜月簾影捲秋河水閣塗妝處臨池點黛螺

花影譚禪

人間弄玉館天上結璘家流照明秋水含芳漪暮霞有花
皆有影非影亦非花色相都如是長空攬月華

琴心悟道

夢覺道心清玉琴窗下橫梅花千萬片流水兩三聲鶴舞
靜中態鴻飛天外情此時列禦寇眞欲御風行

題舒鐵雲南籠軍營詩後

三苗逆命憑三危西川都護大出師秀才從軍古所有君
亦戎幕稱軍諮孫惠造表最慷慨應詹草檄尤淋漓戍士
拾鏃前代郭將軍勒馬何年碑諸葛弩牙色斑駁伏波銅
鼓聲參差奢香花鬘開古驛濟火藤甲留荒祠龔仙窈窕
背花泣么妹矯捷彎弓馳萬里鑿空羨博望上馬殺賊資
修期投壺校射頗清暇盾鼻殘墨還題詩樞府不許上功
狀投筆歸臥南山陲封侯客帳春夢破閨中空感垂楊絲
眞州老去作食客廣陵花月填新詞玉臺金粉妙宮體豈
識曾卻千熊羆名場冰炭君久歷宦途荆棘吾深知君今
僑寓不歸去南湖相約尋漁磯

憶蓉裳蜀中同樊邨作

憐君久爲客故里竟無田蜀道人千里秦關信隔年蟲聲
秋滿地雁影月流天欲寄相思去明星井絡邊

後水車行

梅雨無多暑雨少入秋不雨禾更槁江南萬頃膏腴田穎
粟紛紛變枯草農民習苦如蓼蟲高下水車田岸遶我昔
四月渡申浦五月重來過圓泖今番七月行又盡依舊歌
呼達昏曉輪敝板折牛亦病車水之人更蓬葆膚皴足裂
朝至暮露宿風餐西及卯車棚作家輪託命無論兒童與
翁媼葑城近海資潮汐斷潢處處黏萍藻蘭陵朱方旱更
甚官河浚後又行潦夏雲奇峯秋雲薄極目神龍斂鱗爪

大府催餉急星火苦說縣官徵不早敲扑皮骨浚膏血會
見催科書上考民勞極處天心迴或者秋成足粳稻桔槔
繁響破塵夢雲漢昭回仰晴昊水車水車爾亦勞惆悵朱
顏令人老

雨中懷梅庵尙書吉林同朱南臺作

橫戈往歲曾回部遠戍今番又吉林 宵旰籌邊 明主
意馳驅報國老臣心黑龍江遠書難到丹鳳城高夢易尋
同是江南桃李樹側身東望各沾襟

雲間舟夜聽雨口占

蓬背響瀟瀟涼風送畫櫓暗雲沉夜雨流水急秋潮魚夢
蘆根淺蟲聲葦岸遙東南半憂旱一例乞天瓢

雨中白蓮涇間渡

秋雨掩篷聽人家隔遠汀相逢黃葉路何處白蓮涇寂寞
殘詩卷相思濁酒瓶前頭問漁父身世各浮萍

秋夜江上

星影參差漢影斜夜深殘月亦清華一江秋露明于玉絡
緯聲涼出豆花

上海贈葉萊山大令

機

兼寄屠琴鵬眞州

我昔佐琅嬛籌筆滄海上說劍對金尊談兵森玉帳木枿
下樓艤組練明鏡仗近視韓說師遠煩楊僕將颶風佐成
功一夜走狂浪豺牙狹獠猛魚腹鯨鯢葬關白悉成揜天
海洗清曠孫盧尙芽蘖遠趁長風颶水米魚艇濟金錢佔

船掠蛟門咫尺地剽忽不可防遂令沿海民間風各悽愴
君時諸生耳憤激風雲壯請纓氣激昂投袂志高抗慷慨
傾肝膈忠義激肺腑子弟盡操兵鄰里悉輸餉縛賊乘月
黑擒生候潮漲百戰敢言功一官聊用貺薦牘登再三中
丞心可諒嵩洛與齊魯宦轍憶在臯經歲事河朔辛苦理
輦蕩往年滑臺變青犢勢奔放烽火照淮泗輦鼓震蕭陽
大府移玉節彭城資保障君時作秦謀虎穴入深墻風雨
渡大河冰雪走層嶂箠笞左右甄枚數東西廣米山聚馬
援蠻圖呈呂伉遂使江表地安堵獲無恙紛紛人海中此
才信豪宕譬如江海水未可升斗量相思十餘載把臂各
神王滬瀆我舊治海門近相望閩粵商舶聚遼瀋雲帆張

附郭多客民聚鬪屢驚創寬猛宜並用高枕未可忘花月
民氣恬文藻土流仰莫矜淵魚察恐致叢棘長莫任城狐
憑或令鼃觚煬遠師潁川黃近學姑蘇況 當宁方求才
似爾足可尙更聞眞州屠徒旅皆虎鬣至今江上梟聞聲
心膽喪同出淮南門楨榦經培養文武本忠孝經濟深醞
釀大才皆可用夾袋付宰相我身入塵世泛泛虛舟漾鷗
鳥汎宦海巖裘速官謫學頗黃老師才甘白蘇讓東閣避
何遜南樓謝庾亮未免久浮沉差幸少依傍左陳雲笈籤
右禮華嚴藏汀洲采白蘋最愛柳文暢宦成婚嫁畢岳遊
幕禽向昨渡黃浦來秋河耿孤舫靜聆輿人頌美譽定非
誑我昔議海運沙船籌轉饒偶讀瓊山書故道幸可訪君

其善畱意此理似非妄贈君五言詩長吟抵功狀翦燭聽
秋潮城外天風盪

江上玩月

月華江上水一片是空明天遠秋無際涼多夢不成鐘聲
雲外落山影雁邊橫清嘯尋常事蒼龍莫夜驚

淞口夜泊舟中讀道書聞海船吹笛作

江流東下海門開鼓角嚴城玉漏催河漢茫茫秋露下帆
檣隱隱夜潮來千秋豪氣新詩卷一笑凡心濁酒杯偶讀
仙書聞鐵笛乘風我欲到蓬萊

喬琴野香岑兄弟邀同朱縵園中翰小集宜園

池館清華地琴尊跌宕人疎狂容我輩蕭散各天真樹樹

陶潛柳絲絲張翰莼一枝花解語紅照酒波春

秋夜吾園池上玩月

舊時樓閣舊時花花裏行廚竹裏車酒氣有香醺睡鸛笛
聲無際起林鴉庭柯沍露生秋氣池水微波澹月華更約
殘春餞紅雨攜琴來賦赤城霞

糶官米

東南財賦地厥壤宜粳稻盛夏久閔雨穎粟變枯槁貧家
無宿春瓶鼎任傾倒指囷訖孰敦乞米帖誰好米價貴珠
玉儉歲始知寶大府雇民食羽檄急飛烏巨室勸泛舟連
檣浮浩渺鹽筴假儲粟分潤徧峯泖常平有良法平糶萬
戶曉升斗恤童稚奔走惠翁媪鳩鵲甦鰥寡雁鷺忻幼小

豈知縣官貧兼以儲穀少國家文法嚴胥吏機謀巧任彼
呼庚癸我祇期寅卯可憐負郭氓夙興望參昴來遲厥門
閉中路泣蓬葆蹂躪及婦嫗棄置到襁褓誰歟作司牧一
任作餓殍我聞上地米崇墉類豐鎬固由富民積亦因莠
民擾邨墟禁糶糴疆界若城堡強梁橫需索婦豎互剔剔
首宜嚴禁令毋使阻狂狡又聞楚蜀米連牆滯中道蘭陵
作平陸梁溪祇行潦停橈船孃歎斂機篙師惱疏浚恐無
濟具區波浩淼何不循江行吳淞徑可考帆落潮宜乘秋
深風可禱計日達吳會庶足慰耆老又聞臺澎米雲帆隔
煙島鉞程三千里戕我達江表所宜善價招豈容文法撓
奸民持短長急應撲此獠夏災期六月入告胡勿早圖少

鄭俠繪詔未汲黯矯轉漕急正供此事非草草敲扑事征
求赤子付誰保 九重有渥澤 恩波流浩浩何不叩闕
闔盡使登熙皞遠望天蒼蒼仰視日杲杲哀哀今癯獨鬱
鬱此懷抱坐對盤中飧欲食不忍飽三復雲漢詩中心怒
如擣

開城河

三百九十橋東西南北水吳城十萬戶一一臨河起闌影
漾金碧簾紋蕩羅綺柳岸綠抱城花溼碧環市畫舫旣安
集商舶亦邈邈三復白傅詩風土洵云美今夏久不雨泉
脈縮未已始猶驗水痕繼乃見河湄四月至五月漸漸露
河底六月至七月一例平如砥惡難流汾澮濟易渡溱洧

居人汲飲絕臣朔渴欲死內外苦蔽塞如人腹有瘡旣由
天澤慳亦因人事圯衆議集枌榆遠慮惠桑梓程期利畚
揭相度勞櫓橈大舩運沙礫小艇漉泥滓運租計殊得代
賑議亦是綠波漾鳴頭紅橋鋪雁齒不見泰娘家依然蘭
舫艤宛在水中央宛在水中沚卽作寄書郵亦復便雙鯉
滔滔詠江漢南國此爲紀奈何蘭陵郭漕渠周環雉河形
若平陸彌望三十里疊舫三月停單舸十旬止蜀米近不
達處處呼庚癸支流問陽羨涸盡東西汎江南古澤國壅
塞乃如此或云獨山門具區尺有咫疏濬功互施可冀波
瀾瀾持議久未決譬若風吹耳我昔濬雲關東下黃流駛
禹廟紅梅花一枝嬌可喜今年浚南橋東及閘港阯所賴

鄉先生一一共經理歉歲竟轉豐收效已若彼人可通舟
楫我亦便行李乃知天下事利人卽利己一卷邠書立
言備野史

讀邵堯夫擊壤集卽效其體

春鳥秋蟲盡可聽角端蠻觸且消停世間何者爲恩怨大
海風吹幾點萍

雁窗平橫玉竦腰長檣鐵鹿阻乘潮從知世路無通塞舟
小篷低易過橋

何妨與世共推移消息盈虛互有之明月圓時萬人見海
潮長處百川知

澹澹春陰漠漠苔嫩晴天氣偶然來百花都在春風裏紅

紫憑他各自開

名場宦海兩無涯一笑浮生井底蛙各有因緣莫相問神
仙飲酒佛拈花

兩生行贈沈生式如

秉鉅

蔣生黼庭

元甄

蔣生溫潤如良玉沈子精神若秋鶴玉質纈密宜珪璋鶴
羽騫騰望寥廓名父之子似舅甥沈生鶴立殊英英修翎
已抱九皋志遠唳欲振三秋聲蔣侯門第中吳好白袷烏
衣才不少就中生也最玉立十五連城重瓊寶兩生數載
從我遊春華努力希前修莫談經濟學賈誼莫幸遭際希
馬周吾願爾學董仲舒目不窺園惟讀書天人三策有根
柢春秋繁露珍石渠吾願爾學鄭康成登樓比譏扶風驚

六經昭明若日月漢之大儒推東京實至名歸有光耀鶴
入煙霄玉薦廟河汾壇坫有光輝莫負今朝兩年少

爲庭桂除蠹有感而作

團團桂之樹小庭陰翳蒼經年未芟翦網絲罨中外青蟲
與懸蛛相倚作狼狽入夏久苦旱復少雨澤需膚皴作龜
坼葉萎若蟬蛻庭綠白露團相對各無奈今晨坐南窗微
馨送幽籟金粟眼界換天香鼻觀會乃知勁直姿未肯困
塵璫感此推物理悠忽誤蘭艾呼僮縛青竹急爲祛其害
因憶吳山頂老榦蔽松檜登臨慰秋思遠眺江如帶靈隱
選幽石金沙臥淺瀨自與故鄉別秋夢墮煙靄更拂闌干
塵今宵月輪大長歌招隱篇一尊爲汝酌

八月廿六日招同舒鐵雲錢松壺集桂葉書堂期蕭
樊邨不至

秋河案戶秋天明草堂夜靜秋風生坐中酒人半秋士高
談雄辨皆秋聲鐵雲昔作經略客大黃玉弩從西征傅永
露布更殺賊枚舉草檄能知兵幕府功狀樞府斥皋橋質
廡歸裝輕金臺故鄉翻作客屯田樂府謳秦青廣陵城西
江水闊今年去作眞州行松壺畫筆近日少雲飛水動各
有情湖山秀氣入詩骨畫簫一卷冰壺清紫蕉庵圖爲我
寫武夷山色橫庚庚君昔從宦走萬里蠻天騎象搖長纓
中年從軍駐來鳳橫刀長揖名公卿花苗未淨白蓮放大
星夜落將軍營酒邊感舊悵不樂歸去欲徬西溪耕近復

移家入陶谷思坐高閣吹瑤笙寺僧寫經最詭寂

松壺所見歸化

寺 猗仙走馬殊娉姪

指龍公妹鐵雲所言

江淮異人不數見餘子碌

碌徒功名

時各舉生平所見異人故云

我愛臥遊嗜耳學桓譚新論殊

可聽是時日暮碧雲合仰視屋角微有星小庭叢桂遭雨

敗餘氣尙作幽蘭馨酒闌燭灺漏聲下放言更使羣兒驚

蕭君前日去婁水畫眉少妾懷嬌憊雕龍炙輶善馳排惜

未來此同飛觥我作此詩待君和郵書火急催揚舲

龐山湖舟夜聽雨

邨柝沉還起漁燈澹欲無雨中秋漲急煙外暮帆孤楓樹

吳江驛蒹絲薛澱湖殘香溫翠被清夢又荻蒲

雲間雨泊有懷謙谷蘭陵

一夜雲間泊潏潏聽雨聲遠燈明斷岸疎柝隔重城客枕
秋先覺寒衾夢不成九龍山下路余季亦孤征

訪七薌以至琴河不值書此奉寄

我來雲間城不見雲間客三日水窗中長吟九峯碧
君去琴河道琴河事若何蘼蕪香冢在秋柳蕩微波

同林桂舟張篠薌假杉泉大令畫舫夜話

城西楊柳記曾攀落葉如愁未可刪萬里秋聲來海上一
時浮客聚雲間最宜良夜清尊坐好趁鄰家畫舫閒有約
迴帆趁重九茱萸同把細林山

雲間舟次對月聽秋圃彈琵琶並訂重九細林攜琴
之約

俞生琵琶天下奇一聲兩聲春蠶絲縷車軋軋春雨寒
女機窗相爾汝春雨漸歇春禽鳴三聲四聲漸有情冰絃
一一按宮徵四聲併作千萬聲初彈一曲將軍令金戈鐵
馬軍容盛彷彿前年破滑臺十萬健兒爭用命東南帥府
雲間開將軍新自彭城來臨淮一變令公壘五花八陣皆
英才軍聲未靜邊聲起漠漠平沙一千里忽然遠雁鳴聲
哀一繩墮入狼煙裏棖觸陰山我舊遊烏灤葉落水西流
紫濛白霽名王部讌罷頭鵝萬帳秋此時尊前酒波碧此
時河上月華白畫船對面畫樓開樓上盈盈玉人出翦燈
添酒意徬徨換羽移宮寫斷腸玉樹後庭春更好陳隋花
月浩茫茫君言古調無過此新聲尙有安公子南朝遺事

感興亡一尊且盡君休矣重九茱萸感故岑江山寥落入
秋心細林黃月秋如夢更約同攜綠綺琴

九月六日同林桂舟張篠簫宋樸夫自白龍潭放舟
至橫雲山登宿雲庵清音閣並訪王尚書墳園歸
舟喜見新月得詩六首

朝發白龍潭秋色已在眼日出曉雲散潮落新水淺花謝
葦漸枯葉脫柳難綰櫓循田塍行緯傍人家轉飛飛上樹
雞隱隱隔林大林外見帆影微波澹可翦時露遠山稜寸
碧入斜昞漁竿戲采蓴風爐閒試薜長吟小謝詩中流望
雲巘

九峯皆可遊橫雲山較近山翠遠可人水勢曲相引雀喜

穀登場牛閒童廢紉農家正刈稻黃雲滿畦吟五斗陶潛
襲下石魯肅園今年夏苦旱雲漢卹民隱泛舟禁過糴封
章亟請賑茲地獨豐收或者天所愍上地車庾勞宜警不
宜哂勝地約佳遊春山話蘭筍

登山不厭高循蹊俯空谷入山不厭深一徑蟠虵腹石橋
橫虛空泉小不成瀑虛閣跨石淙琤琤響琴筑覽物感秋
深瓦缶植叢菊虛窗納遠景人家抱山麓天馬從東來雲
氣紛馳逐霜林葉漸紅殘草秋猶綠小山叢桂花餘馨送
金粟遠寺出紅牆一半隔修竹

出寺循磴下敗瓦見廢垣隔垣見喬木云是尙書園枯籐
絡石角荒池涸雲根山花翁仲立野草牛羊躑一抔隆然

高時見麀麀奔緬昔立朝日江左開龍門私史達皇覽名
與蘭臺尊後來徐司寇史局隨高軒莫釐馥紅蕙花瑞徵
山邨先河此其導班馬同淵源嗟哉不朽業是之謂立言
摩挲各懷古片石斜陽溫

虞預竊王隱郭象盜向秀晉書褚生作法盛攘之陋化書
譚子著齊邱奪之繆文字生機謀翰墨啓兵寇或以權力
劫或以貨財購古今皆一轍後世增慙詎側聞史橐作萬
君學最富志經蔡邕定書兼伏勝授如何經進日曾不列
名奏三復望溪文處士德彌茂安得儒林丈刊定表耆舊
秋興空復佳興盡吾欲逝夕陽景漸西暮色起無際晚稻
猶未登中有萬家稅幸免旱魃虐忽聚蚊蠱細如煙復如

霧遠視微可睇周雅螟可怪春秋蛾有例我心如鴻雁頗
爲稻粱計長橋雁齒平新月蛾眉麗沿流汭城郭燈影紅
樓閉重九待題糕攜琴約秋稷

廣富林拜明兵科給事中陳忠裕公

子龍

墓並弔考

功夏文忠公

允彝

細林山前白楊樹風雨鵂鶩啼日暮翁仲無聲立古苔路
人指點黃門墓黃門早歲已有名名公之子蜚英聲終賈
年華重西漢膺滂氣節推東京先後雲間立幾社勢與東
林共朝野慨然著述兼神仙高懷誰是如公者漳浦門牆
世羽儀黨魁奄禍事難知清流白馬當時恨荆棘銅駝異
日悲會稽行賑恩方浹東陽勘亂才尤捷倘教西北付邊

防或者東南濟舟楫西來青犢太披猖席卷三關破九閭
虛擬浞津迎太子已聞弓劒訴高皇半壁朝廷推戴急貴
陽入輔祥符出三策天人董仲舒倚柱嘯歌悲漆室歸營
窵窳避蒿萊朝軸紛紛事可哀四鎮纔看移節去北兵已
報渡江來扁舟從此歸圓泖水月庵深魂夢杳披髮西臺
慟哭人披緇肯向空門老慷慨聊城魯仲連下江兵起徧
烽煙江山涕淚中興日天地蒼茫報國年魯王監國唐王
繼視師浙直同盟誓江左英雄大有人珠沉玉碎終何濟
鳳舉鴻鸞入網羅氣吞湖海重山河白雲遺草湘眞閣卽
是文山正氣歌悲田有客心何苦月黑煙江聞鬼語千秋
埋骨此山阿猶是趙家乾淨土同時健者夏考功貽書卻

聘詞如虹請存亡社備三恪壯志未遂悲填胸松塘水淺
濡首死沉湘屈子同其忠青山里開共祠廟英靈萬古生
長風

駱駝墩弔宋理宗林妃墓

鳳皇山下駱駝墩殘碣猶傳宋代墳不向明湖埋錦韞卻
來圓泖葬羅袞翠華宮闕迷秋草金碧湖山冷暮雲閻賈
同時更恩寵有無遺冢傷斜曛

過北金雞湖

一半湖光紫輕雲蕩日華夜霜醉楓葉秋雪冷蘆花岸似
圍屏疊橋疑寶帶斜金雞飛去後鷗鳥聚圓沙

繡山內弟從者胡鈐故營卒也自言隸軍籍者十八

頤道堂詩選卷十二

三

年庚申海上之役曾從阮中丞至松門獲海寇命
貴利身在行間雨夜聞之感而有作

黑雲如磨雨腳長秋聲淅瀝秋齋涼殘燈無燄客不語我
亦跛脚眠匡牀此時安得一尊酒聽說健兒好身手少年
刺籍隸綠營寶刀在腰弓在肘淮南侍郎持節來喧闐笳
鼓軍門開伏波下瀨共籌海金弢龍虎非凡才是年東南
海氛惡安南艇匪羊山泊犄角更有鳳尾幫眼見蛟門成
虎落侍郎憂國宵焚香三省合勦秦九閩台州松門駐旌
節重關鐵牡心周防是時六月月下旬颶風東來拔林木
洪波震盪海濤飛多少帆檣葬魚腹人言天后效順雲旗
翻或言銅礮擊龍龍怒蟠侍郎忠誠格天地滌蕩海宇清

厚坤餘孽紛紛濟內地鐵額銅頭尙恣肆諸將論功各有
差索貫長鯨侖貴利可惜南交兩列侯竟隨斷艦沒洪流
當時倘縛飛黃獻也算軍功第一流海洋靖後歸軍府收
馬依然舊行伍同時火伴作官人頃刻雲霄色飛舞朝脯
不飽馬乾錢辛苦軍中又幾年肘後垂楊空自惜乞除名
字去歸田歸來那得閒田種老去依人心自痛濁酒殘燈
感百端醉來尙作封侯夢宦海飄零也若斯當年我亦事
軍麾琅嬛籌筆吾親見轉憶瀛舟刻燭時筆談辛苦勞重
輯殘夜懷人天似墨江湖西上戟門遙雨聲不止秋窗溼

寒月聞雁懷鐵雲眞州

寒月映朱樓月華樓上頭殘花三徑晚落葉幾家秋小別

者番夢故人何處舟江南嗟歲儉鴻雁下汀洲

月夜盼琴兒不至

高堂昨憶我今我憶吾兒夜月皎如此汝行安所之霜重
客衣冷風定孤帆遲寒意偏殘燭照子吟此詩

龍門謠

朝登龍門暮登龍門不見東海鯉魚但見鯀鱗翔舞龍
輿奔朝望龍門開幕望龍門開不見龍門但見白日照耀金
銀臺金銀臺高接天龍門開青雲巔虎豹守關狹獠怒東
海鯉魚掉頭去

梁溪道中風雨

柳散千行碧楓凋幾樹紅長風吹古岸落葉打征篷客夢

殘燈裏孤舟細雨中九龍山下路杳杳聽飛鴻

梁溪舟中讀陳其年胡稚威兩先生詩集因書其後
李杜詩名孰先後士仰昌黎森北斗東坡才氣追太白萬
斛泉源向東走詞壇兩大競雄長各有精神貫長久國
朝人文二百載家握隋珠珍享帝亭林翁山入前代天民
所作得天厚婁東一席姬長慶沉鬱往往過元九愚山清
瘦瑩冰雪澄澹天然入韋柳濟南高華樵李健此外紛紛
更誰某陽羨才人故家子脫手風雲一千首湖海飄零付
長蘧花月滄桑感杯酒逸才復見眉山蘇海氣凌空涌層
阜石筍山人更大餘事爲詩亦深黜元音清廟中琴瑟
古色明堂勒鐘卣胸中積羽富委宛不落龍蛇落蝌蚪盤

空硬筆駭籍湜奚止衡岳誦岫嶠嗟我學詩二十載佳句
往往在人口鸞掖鳳翥謬見賞魚目碲硖衆所有平心鑒
古校得失未免春華嗟速朽近來頗嗜二子詩硯匣丹鉛
不離手前路導我升堂奧真氣逼人驚戶牖兩詩不同各
有得步武韓蘇論師友陳詩不識誰所貽胡詩親自師門
受稚威集爲琅嬛仙館所刊文章氣格更醇古經史取材若林藪遠掃
盧駱同襟批近俯徐庾若廊廡大科兩舉不見收抱玉空
山肯求剖斷斷援禮拒時相始信文人能有守論詩吾愛
蕭子雲謂裴東蕭樊邨一代風騷多去取置我舒王彭郭間未脫
畦町還自咎西神山麓芙蓉湖寒月照人蓬鬢醜一編深
黑映船唇雪浪打船聲怒吼翦燭急爲追亡逋詩卷相期

如汝壽

舒王彭郭謂鐵雲仲舉甘亭頽迎也

童萼君觀察自蘭州奉太夫人喪南旋道出吳門過

余桂葉書堂話舊

與君不相見彈指十年餘薄宦吾江表承明子直廬逕花
秋後晚庭樹月中疎回首觚稜夢琅嬛共讀書

話到前年事驚心感百端弓刀喧紫禁烽火照金鑿雷雨
神明佑恩波父老歎多君知政體曾憶諫書看

甘涼天萬里杳杳赫連臺辛苦版輿去淒涼丹旆回風塵
雙鬢老雨雪片帆哀莫忘求言詔蒼生要此才

太息談江左官民一例窮青天憂旱魃赤地徧哀鴻牛象
來何事雞蟲鬪未終東南元氣在培養望羣公

雪中觀壯士舞劍

昨日飛雪今日晴杲杲寒日天空明龍山壯士好結束曼
胡短後飄長纓張華雷煥去已久雙劍何來入君手莫邪
于將爭雄雌蒼龍悲嘯怒蛟走左右縈拂素練揚風雲滿
空花滿堂山岳震動江海涌滿庭積雪爭寒芒方今海寓
正清晏妖氛掃淨無傳箭裘馬貂蟬自有人如君那不長
貧賤君不聞男兒在世如麟鳳未許輕爲知己用卽如此
劍雙白虹斂鐔鐔鎡始殊衆薛燭相劍劍術微莊生說劍
劍士稀梨花卷地北風急又見青天飛白雪

寒甚哀凍死者

盛夏旣酷暑嚴冬必奇寒朔氣動瘡發物情慘不歡北風

利刀箭中人若刻剜積雪迎衢路堅冰結井幹猶犬亦就
人饑鳥息羽翰重裘襲狐貉不異衣襦單矧此無衣民短
褐嗟不完赤足露肩膊瘦骨支骯髀被體尙如此豈能望
豆簞夜聞泣路隅曉已乞柳棺城闔與巷陌葦箔橫闌干
里正報官府跳躍走豺獾一一待臨驗官亦行路難昨聞
大官過牽舟逆羽旄暮發胥江驛朝泊梁溪灣山魃走躑
躑跛鼈行蹢躅斃者十餘輩僵臥如鼠隄見者慘肌骨聞
者摧心肝造物誕黔首辛苦黃土搏旣生無以容母乃任
草菅闔門十萬戶富家殊闐殷百十付褚師拯此惇與鰥
庶生太平世不負天地寬綈袍感范叔大裘念香山仁義
各自爲不在心力間窗外聲颯颯天上雲漫漫呵凍作此

詩讀竟還三歎

雪中有感

風勁雪花麤紛紛九衢誰家醉金琰定復擁紅爐今歲
江東米珍於海上珠茆檐小兒女幾箇有完襦

輓家小筠協鎮兼信尊甫樹齋軍門

老淚零星定不乾書隨潮汐下江干三年虎帳春雲遠一
角龍山夜雪寒思子臺悲新樂府夢兒亭圯舊軍壇不堪
四十年來事併作商聲一夕酸

小侯四姓漢金張奕世承恩潮國殤蒼壁勳勞殉金馬羽
林袴褶唱黃鑒翠華宮苑灤河靜珠樹煙波海淀涼最憶
袁江從軍府幾番風雨話匡牀

滑臺往歲起烽煙青犢西來避控絃謝石功名淝水上周
瑜聲望皖江邊驕嘶翡翠三花騎怒拘珊瑚七寶鞭解唱
鴛鴦李都尉登壇玉貌本如仙

肅肅霜華急雁翎感君身世太漂零一棺風雨節邊寄萬
里家山篷裏聽諸弟青年空壯志兩親白髮各衰齡先臣
邱壠知何處極目甘涼墓草青

粥廠

災區集饑民縣官設粥廠城闔路康莊寺觀地平敞增竈
師虞詡運米資韓滉疲癯紛扶藜孀嫗遠負襁伶俜走鳩
鵲躑躅聚夔魍各各攜筐篚紛紛挾盆盎植木固壁壘剖
竹合筴簞魚貫集晨烹麪至趁味爽道殣疴賴哺溝瘠瘦

待養公叔賢可師黔敖事在曩惟聞當事憤頗任胥役罔
鍛石充楚麋屑榆冒葛饒滯腹劇肝胃澀口扼咽吭定致
釀疫癘行見斃塵埃實政頗有人良法近可仿秣陵吏治
賢京口士氣慷慨道在均貧富事先周里黨戶籍既羅胸姓
氏咸指掌平糶貸金鍾散錢俵緡緡既可避寒凍兼亦息
勞攘姑蘇矧蕃庶媪鰥夙豐穰如何謀不臧致令民無仰
織嗇始巨室謬誤由官長夏統拘螭蠅杜陵拾杞椽凶札
天所昇安危人是仗煌煌名公卿歷歷豪僧駟祇解較錙
銖遑復念草莽警耳雁鳴哀關心鼠憂痒剪燭擁寒爐一
盂慚獨享

春夜聽雨

幾番春雨兼春雪不斷空階夜滴聲燕子心情愴寒食杏花消息釀情明租船江上仍無信米價城中更不平正是哀鳴鴻雁急一編荒政坐深更

雲間春夜寒甚偶書

舊遊經歲別小住百愁生夢短華燈暗春寒翠被輕貔貅江上騎鴻雁澤中聲畢竟資安集躊躇此夜情

浦東飢民肆掠軍門

遣兵捕治故云

讀春木詩始知薊雲沒於楚南詩以哭之

論交共京輦錄別憶涼州逸氣金刀健邊聲鐵篴秋杜陵前出塞王粲獨登樓萬里西征路臨洮黯黯愁

十年消息斷驚讀武功詩涕淚琴三疊悲歌笛一枝題襟

殘墨在掩袂夜燈知寄語劉賓客遺編我所思

遺詩在劉
美初處

夜歸

春月澹春城春城半月明五茸煙柳暗三泖夜潮平遠夢
迷燈影輕寒減笛聲重闌指歸路寂寞客中情

月夜素山見過

他鄉君久客羈宦我浮家衣食驅身世江山閱鬢華夜煙
暮修竹春月澹疎花一笑且爲樂我身安有涯

初九夜喜七鄰見過有懷叔美白門

故人如好月況是客中看刻燭聽殘漏添衣話峭寒無書
緘短夢有客去長干憶爾松陰裏清輝照夜闌

花朝次夕招同張蒔塘大令曹蓉初范芸卿姜小枚

內兄龔素山小集寓齋玩月並答云卿見贈之作
河干煙柳又堪攀尊酒聊因破旅顏羈宦萍蹤來海上諸
君文藻久雲間燈明廣座春痕重月轉高城夜色閒來日
片帆何處是朗吟詩句過青山

青浦道中月夜望九峯

朝辭黃浦煙暮攬青溪月月華散冰雪春寒峭未歇東風
吹綠水征帆夜中發翦燭感舊夢微吟悵羅襪登艫眺煙
景流波動滑笏一峯橫我前蒼屏開突兀彷彿絹素中墨
痕澹欲沒九峯此第幾圖經亦恍惚夜色逝悠悠春華消
忽忽回首望春城疎星墮林樾

十五夜黃渡對月有懷

春雲澹如秋薄羅染深碧倒影綠水中漾此月華白月華
殊有情又照孤舟客前夜雲間城昨夜青浦驛來日又何
處或者申江汐有無陰晴異兼之雲霧隔過去與未來相
視總陳蹟惟有眼前景春華莫虛擲滅燭啓蓬窗團團攬
圭璧圓靈靜可玩清輝近堪摘明星羅耿耿春情動脈脈
眷念畫樓人幽思生遙夕

筍香招同人集吾園書二絕句

紅雨樓前花未放綠波池上雨初晴十眉環侍題襟處回
首煙波似隔生

杏花如雪照春衣小舫浮香舊夢非柳影靜浮魚婢出竹
陰閒看鶴雛飛

觀鶴舞贈女郎文鶯兼感舊遊

風雲憐逸翮花月動芳春舞鶴畱新賦驚鴻憶舊人

喬琴野香岑昆季招集宜園

又學山公醉習池攀條重問桺絲絲輕寒庭榭花開晚薄
暮簾櫳月上遲往事夢回詩卷在故人情重酒痕知中年
哀樂難消遣更爲雲英賦十眉

將歸吳門以吳淞水涸改由黃浦聞糧艘亦議改道
書以志事

昨向吳淞來今從黃浦去黃浦風色好春帆帶江步側聞
糧艘行改道議方具派浦入泖湖徑捷事非誤若輩熟遊
地何事論乖迂我思古澤國東南重財賦矧此三江委蓄

洩允先務往年憂雲漢膏血耗車犀揭竿幾釀患祇以艱
食故富室半內徙屯兵尙久戍旱災已足鑒水潦尤可慮
民勞亦孔亟國帑亦有數顧慮成因循此錯未可鑄浩浩
海門潮厯厯雲間樹回首望吳淞寂寞來時路

月夜行薛澱湖

薛澱生春水吳淞落夜潮煙波春漠漠星斗夜迢迢水國
寒猶峭高樓夢未消疎林上殘月辛苦照歸橈

舟人析薪爲爨香味甚烈殆良材溷於叢櫟者與感
而賦之

一覺恬清夢溫磨鼻觀通科頭看煮茗焦尾惜枯桐冰雪
空山裏文章劫火中憐才兼感遇此意古人同

朱野雲自豫章至卽送還京師竝寄雲臺中丞師

幾年不見朱公叔三度蘇臺煙柳綠憶君極目春明城君
來恰自章江曲君自章江來能言章江事章江春水雙鯉
魚腹內琅嬛數行字琅嬛槩戟吾師門人倫海內推膺蕃
江波遠溯一千里廿年常戀師門恩書不盡言託君說頻
向門牆懷軼轍謂曼生家貧親老宦不進傲骨摧頽安我拙
迷津那得寶筏渡劫灰幸未鴻毛熟名場宦海兩無著消
盡凡心味禪悅煙江三月春水生君今又作春明行章江
使節應入 覲蒼生論罷聞宮鶯君到春明定相遇欲寄
丹心託豪素萬柳堂前柳絮飛回頭應憶蘇臺樹

吳下重遇段懋堂大令

禮堂化蜀漢文翁更纂凡將訓學僮話舊定宜思白傳觀
書應復憶黃童經神嶽嶽公橫席宦海茫茫我轉蓬二十
年來更相見青山無恙夕陽紅

余始見君於琅嬛仙館故第三句云然

春暮過花步訪王椒畦同坐寒碧莊池上作

經年不見王摩詰春盡初來一叩關殘雨樓臺花外路斜
陽金碧畫中山牡丹落後人初到燕子歸時客未還

謂主人蓉

峯羨爾煙霞作清供碧峯十二共蕭閒

郡齋東園讞獄呈申南邨太守

自我來江左試吏已九載攝篆僅四邑未期輒受代聽鼓
鳥集林散衙魚逐隊折獄非所長亦復事推劾從來三只
法所苦在煩碎漢庭決事比片言生死界天地與鬼神不

在方寸外嚴張漢傳警來周唐史戒聽訟吾猶人古訓良可佩

江左十一州遠者千百里獄成至省會道長疲徒吏趨避生緣飾實情所餘幾事外苦蒐索滋蔓未有已官府一紙書婦子幾家死餓殍與凍骸纍纍在筆底獄訟之煩興事亦多由此可以速則速是在實心耳

園中譽嘉樹綠陰紛松杉中有兩奇石兀立森東廊勒銘美貞固作者趙

酉

與汪

志伊

自我來見此八九經星霜苔

花積逾厚綠意深奇僵石畔一株梅古幹橫修篁花開戰冰雪花落回春陽暇亦對吟詩月色遲昏黃寒鵲時飛來咻咻復鏘鏘春雨池水足照我成老蒼

申公古經生今之賢太守潛心究案牘朱墨不去手得情
祇哀矜此意眞父母爲言逾五旬官亦十年久膝前無兒
女精神亦衰朽寧爲上官斥豈任鬼神咎聞言我太息立
意何深厚韋白與龔黃此意各無負願君持初終忠恕答
我后

紫衣

紫府樓臺紫玉煙卷衣秦女謾神仙鳳皇弦上同心語鸚
鵡籠中小謫年白石三生情供養桃花一樹笑姻緣五湖
春水西江月相送煙波萬里船

聞墨卿太守墨莊駕部先後沒於揚州詩以哭之

十年誰諒罷官貧感逝詩成味苦辛父老解談前太守江

山空待謫仙人精神慘澹畱殘墨功罪蒼涼感戰塵欲賦

招魂渺何處晚潮西上訴魚鱗

右弔太守

當年奉使過麟洲海外三山賦壯遊十載迴翔仍畫省一

家歌哭又揚州觚稜舊夢燕臺遠巫峽歸雲蜀棧秋一樣

羈魂招不得山塘斜日泊孤舟

右弔駕部結語指船山也

苧衣篇

獄訟繁興上官持法苛細風雪中苧衣載路皆贖

中牽連經歲不得歸者也陳子憫之作此詩以告

當事

朝見苧衣人躑躅府中趨暮見苧衣人瑟縮旅中居問爾
胡爲來羽檄催朱符問爾胡不去案牘方齟齬問爾來幾

里水陸郵程俱問爾來幾日歲月寒暑徂地或千里遙期
或經歲餘何曾扞法網牘尾牽連書雪消已見曉霧障猶
塞衢北風吹鴻雁集霰方載塗驟寒忽中人刀箭森肌膚
啾啾籠中鳥戢戢釜中魚畏子不敢奔引領歌大車翻滾
赭衣溫猶得生須臾骨肉任爾睽田園任爾蕪鄉關不可
見望眼雲模糊大官方持律剖析窮錙銖問爾歸何期臘
盡歲且除朝餽不果腹芋衣行亦無哀矜感行路太息到
吏胥嗚呼芋衣人爾曹真何辜

和朱南臺大令寒夜見懷原韻二首

團沙散雪總相思又到春燈餞臘時萬里關河通夢寐十
年羈宦感須眉何須鸞鳳翔千仞也似鷦鷯寄一枝記取

郡齋池上月生平幸未識君遲

銷盡名心捧檄來吏才澀縮似詩才儘多名輩登臺閣尙
有英流困草萊霜鶴唳空驚曉月蟄蟲銜土待春雷還元
閣畔青山路飽看梅花萬樹開

原作

朱樹基 南臺

晚衙才放寄閒思荒落深慙老大時豈有煙雲驅手腕

但餘霜雪上鬚眉松盤黛色標新幹梅抱春心養舊枝

獨客閉門工索句紙窗燈火夜眠遲 君試吏十載不得
真除爲郡縣諸君

獄疑獄歲以百數晚歸必讀
書數寸間以吟詠寒暑無間

昂昂鶴立出羣來詩史人兼富吏才詞翰有聲排館閣
神仙無分隔蓬萊一官久滯長名榜小試先騰百里雷

署篆所到
歷著政績
我已風塵歎茅塞無多懷抱爲君開

南臺疊前韻見投走筆和之

挈鷺盟鷗我所思豪情不羨鄭當時浮沉涉世聊投足深
淺隨人感畫眉到海水原千百轉凌寒花尙兩三枝春光
又見從頭起風雪殘年未是遲

題襟歸去褐裘來未必橫流要此才但使酒樽邀北海何
須博議續東萊鶴盤孤嶼三更月龍起天池一夜雷賴有
新詩當吉語高堂懷抱酒邊開

原作

無端客感幻奇思古髻何曾解入時顧影流年增馬齒
誰家新月鬪蛾眉明珠久待無雙價好雨偏滋最後枝

惆悵美人隔秋水珊珊環珮怨來遲

鶴筆飄然踏雪來風流端合屬斯才米家船舫多書畫
仲蔚庭除尙草萊入世無緣爭錦繡盤空有筆縱雲雷
遊仙昨夜曾同夢閭闔門高撼欲開

乙亥除夕哭舒鐵雲孝廉兼寄王仲瞿袁浦蕭樊邨
婁東

一樣春官同被放我祇三黜君九上一樣人海同浮槎我
猶羈宦君無家憶昔識君在京縣琅邪孝廉介相見詩龕
聽詠三君詩酒酣落筆開生面重逢恰在姑蘇臺風塵拂
拭懷抱開蘭陵明經好文學愛君高論非凡才君昔奔才
似天馬少年聲價金臺下陳琳阮瑀爾何人書記翩翩最

都雅遠遊中歲從票姚大軍正戡安籠苗蘘仙婉孌公妹

麗飛書草檄真人豪幕府論功樞府忘空署頭銜等捐棄

一事應過溫太真絕裾肯拂慈親意全家寄食來江東一

車行具如葛洪吳興橋李幾遷徙皋橋賃廡師梁鴻君房

語言天下妙三筆六詩富才調眼光橫掃三千年兒女英

雄付憑弔君之才筆無不宜史家三長尤在詩遺山道園

遜爾博玉川昌谷無此奇堂堂之旗正正陣蕭君以我與

君並我之遜君豈十倍如以疲駑匹神駿往年君自京師

歸細塵京洛生素衣山陰秣陵遠負米鶴骨苦瘦鳳苦饑

淮南有客如程卓玉山風義追金粟鸚鵡賦就歎禰衡鴈

鵠詩成知鄭谷

謂巴君樸
國昆季

迎鑾江上秋風生送君去去真

州城前期餞君重九後小齋燈火吟秋聲江水茫茫片颿
駛君之遠遊非得已北堂慈竹減春陰風木皋魚感遊子
麻衣如雪扁舟還歸來不見慈親顏霜華滿樹孝烏泣飲
血未已還呼天哀毀滅性禮所戒瘦骨支離神久憊文章
無命醫無功病入膏肓竟凋瘵鬼車作陣鵠鵲啼殘燈欲
盡寒中閨漏下三鼓急足報酸風切切天悽悽今年太歲
在乙亥頗似龍蛇厄年載海內老輩半零落梁木摧頽泣
眞宰今年老輩如姚姬傳段懋堂梁山舟伊墨卿張船山諸君先後歸道山今夕何夕歲屆
除萬鬼合避新桃符戴逵不死謝敷死少微星墮青天孤
君心如金復如玉君味如蘭復如菊君藝之精入杳冥君
才之大橫海嶽君家奕世爲清門故鄉無家堪自存有兄

浮宦歸未得

君兄何在黔中歲久不通音耗

三子憔悴皆未婚一女許字

亦未嫁晨昏奉母嗟嬋媛著籍吳越未可必一廛無庇蓬

無根矧有兩棺未卜葬蕭寺兩地悲冢壙

君欲著籍武林所志未遂君父

柩尙寄烏鎮僧寺

列傳何人志獨行墓碑何日題詩人搔首問天

天不語悲歌未竟心煩冤叟江東下波渺渺袁江北去流

渾渾明經孝廉有同志長歌和我招君魂